



## ADMINISTRACIÓN LOCAL

### PROVINCIAL

#### DEPUTACIÓN PROVINCIAL DA CORUÑA

##### Servizo de Cultura, Igualdade e Dereitos Cívís

*RP 2026/11664. Aprobación das bases e convocatoria do Premio Otero Pedrayo 2026*

Por resolución do Presidente da Deputación da Coruña número 11664, do 23 de marzo de 2026, aprobáronse as bases e a convocatoria do Premio “Otero Pedrayo 2026”; de acordo co establecido na base 4.2 publícase o seu texto completo

#### **BASES REGULADORAS DO PREMIO “OTERO PEDRAYO 2026”**

##### **1. Convocatoria**

1.1. Convócase o Premio “Otero Pedrayo 2026”, dotado con dezaseis mil euros (16.000,00€ ), segundo as disposicións do regulamento correspondente.

1.2. Esta convocatoria corresponde ao ano 2026, de acordo co disposto no regulamento, no que se establece o seu ámbito autonómico e o seu carácter anual; convócaa cada ano unha das deputacións provinciais da Coruña, Lugo, Ourense e Pontevedra, por esta mesma orde.

1.3. Atendendo ás razóns expostas, a convocatoria e concesión do premio, na edición de 2026, atribúeselle á Deputación Provincial da Coruña, que consigna na partida 0612/3341/481 do seu Orzamento de gastos o importe do premio e no de ingresos, as sumas que deberán achegar as demais deputacións de Galicia, cotitulares do premio, cunha contía de 2.000,00 € cada unha delas e a Xunta de Galicia, cunha achega de 8.000,00 €.

Os gastos correspondentes á organización do premio imputaranse á partida 0612/3341/22609, e serán obxecto da correspondente aprobación e, se é o caso, dos preceptivos expedientes de contratación.

##### **2. Obxecto do premio**

O premio “Otero Pedrayo” ten por obxecto:

- Perpetuar e honrar a memoria da persoa egrexia no campo das letras e do coñecemento
- Premiar un labor que constituía unha contribución eminente á cultura galega
- Promover os valores propios de Galicia e as obras que leven ao esclarecemento e á mellora da súa cidadanía e institucións

##### **3. Persoas candidatas**

3.1. Poderán optar ao premio:

- As persoas naturais nadas ou residentes en Galicia ou con cumprida raizame nela
- Os grupos de traballo radicados en Galicia ou constituídos para promover a cultura galega
- As personalidades ou institucións que se caractericen pola difusión e polo mantemento da cultura galega

3.2. A opción ao premio determinarase por unha candidatura, que poderá ser feita por:

- Calquera persoa física ou xurídica das sinaladas no apartado 3.1., respecto de si mesmas.
- As entidades académicas e culturais galegas respecto dos seus membros
- Calquera das persoas que ocupen a Presidencia das deputacións provinciais de Galicia, a proposta das respectivas comisións de Cultura
- A Xunta de Galicia, oída a Consellería correspondente
- O mesmo xurado, xa constituído

3.3. Non poderán se premiadas aquelas persoas que teñan a residencia fiscal nun país ou territorio cualificado regulamentariamente como paraíso fiscal, de conformidade co disposto no artigo 13.f) da Lei 38/2003, de 17 de novembro, Xeral de Subvencións.

#### 4. Tramitación

4.1. A presentación de candidaturas ao premio deberá realizarse preferentemente por medios electrónicos a través do modelo “solicitud xeral” dispoñible na sede electrónica da Deputación da Coruña (<https://sede.dacoruna.gal>).

Opcionalmente, poderá presentarse a inscrición de forma presencial en calquera dos lugares e rexistros establecidos na normativa reguladora do procedemento administrativo común.

4.2. O prazo para a presentación de candidaturas será de tres meses, a partir do día seguinte ao da publicación desta convocatoria no BOP da Coruña. Esta publicación realizarase tamén nos boletíns oficiais das provincias da Lugo, Ourense e Pontevedra, no DOG e nos diarios de máis difusión da comunidade autónoma.

4.3 Xunto co formulario de presentación de candidaturas as persoas interesadas deberán achegar a seguinte documentación:

- Recensión biográfica da persoa ou agrupación que aspira ao premio
- Documentos e antecedentes que se consideren de interese para o coñecemento da súa dimensión literaria ou científica
- Cinco exemplares do texto do traballo co que se opta ao premio, no caso de que a proposta se basee nunha obra ou produción singular concreta (un único exemplar se se presenta por sede electrónica)
- No caso de agrupacións e institucións, un exemplar do regulamento ou estatutos polos que se rexan e unha relación das tarefas levadas a cabo en relación co obxecto do premio

4.4. A presentación da candidatura determina a aceptación íntegra das condicións desta convocatoria e das contidas no regulamento do premio.

4.5. Todos os trámites administrativos que as persoas interesadas deban realizar durante a tramitación deste procedemento faranse preferentemente por medios electrónicos a través do modelo “solicitud xeral”, dispoñible na sede electrónica da Deputación da Coruña (<https://sede.dacoruna.gal>), ou presencialmente en calquera dos lugares e rexistros establecidos na normativa reguladora do procedemento administrativo común.

4.6 No caso de que a solicitude non reúna os datos exixidos ou calquera dos previstos no artigo 66 da LPACAP, requiríraselle á persoa interesada que emende as faltas ou presente os documentos preceptivos no prazo de 10 días hábiles e indicáraselle que, de non o facer, considerárase desistida a súa petición, que se arquivará sen máis trámites.

4.7 Unha vez rematado o prazo de solicitude a Secretaría da Deputación da Coruña expedirá unha certificación das propostas presentadas que, xunto con elas e coa documentación correspondente, pasarán ao xurado do premio, para que todos os membros as coñezan con antelación suficiente á reunión de deliberación.

4.8. A cada solicitude ou proposta xuntaráselle cantos documentos se consideren de interese para o mellor coñecemento do/a candidato/a.

#### 5. Xurado e actuacións

5.1. Para adxudicar este premio constituirase un xurado integrado por:

- *Presidencia*, a persoa titular da Presidencia da Xunta de Galicia ou persoa en quen delegue
- *Vicepresidencia*, a persoa titular da Presidencia da deputación que convoca o premio, que este ano lle corresponde á Deputación da Coruña, ou persoa en quen delegue
- *Vogais*:
  - As persoas titulares das Presidencias das tres deputacións restantes, ou persoas nas que deleguen
  - A persoa titular da Presidencia da Comisión de Cultura da Deputación que convoca, ou persoa en quen delegue
  - A persoa titular da Consellería de Cultura da Xunta de Galicia, ou persoa en quen delegue
  - Unha persoa representante de cada un dos seguintes organismos:
    - a) Universidade de Santiago de Compostela
    - b) Universidade de Vigo
    - c) Universidade da Coruña
    - d) Real Academia Galega
    - e) Instituto “Padre Sarmiento” de Estudos Galegos
    - f) Fundación “Otero Pedrayo”

- Cinco persoas de recoñecida autoridade científica e literaria, designadas pola Xunta de Galicia e de cada unha das deputacións

Procurarase a paridade de xéneros nos membros do xurado

- *Secretaría*, con voz e sen voto, a persoa titular da Secretaría da Deputación da Coruña, ou persoa en quen delegue

5.2. A composición dos xurados darase a coñecer, con anterioridade á súa reunión, no taboleiro de anuncios da sede electrónica co fin de que se poidan interpor, se é o caso, os recursos legais pertinentes.

Aplicarase o disposto na Lei 40/2015, do 1 de outubro, de réxime xurídico do sector público (LRXSP), Título preliminar, Capítulo II, Sección 3ª: Órganos colexiados das distintas administracións públicas”, artigos 15 a 18, no que se refire tanto á validez da súa constitución, como á actuación do xurado.

As deliberacións serán secretas e delas serán estendidas as actas correspondentes.

5.3 O xurado constituído emitirá o seu ditame no mes seguinte ao día no que remate o prazo de presentación de candidaturas, e a súa actuación suxeitarase ao disposto nos artigos 4.2 a 4.6 do regulamento do premio.

5.4. Da actuación do xurado e da adxudicación do premio redactarase unha acta detallada que, asinada polos seus membros e coa totalidade das documentacións presentadas

5.5. A copia da acta e dos demais antecedentes que cumpran para o coñecemento da tramitación do premio remitirán-selles ás deputacións da Lugo, Ourense e Pontevedra.

5.6. A proposta de concesión que formule o xurado será obxecto da resolución da Presidencia, que resolverá a súa aprobación, previo informe do Servizo de Acción Social, Cultural e Deportes e do Servizo de Fiscalización.

A resolución de concesión será dada a coñecer ao Pleno da Deputación provincial da Coruña, e publicarase a través do Boletín Oficial da Provincia.

## 6. Pago do premio

Para o cobro do premio, que estará suxeito ás retencións legais correspondentes, deberán presentar a seguinte documentación:

- Certificacións das administracións tributarias correspondentes e da Tesourería da Seguridade Social nas que se acredite que a persoa está ao corrente nas súas obrigas tributarias e coa Seguridade Social

*Poderá omitirse a presentación desta documentación sempre que envíe un documento autorizando expresamente á Deputación provincial da Coruña ás consultas tributarias e non se opoña á consulta de datos da Seguridade Social*

- Comunicación de alta de datos bancarios para o rexistro de terceiros, que figura no apartado de impresos oficiais da páxina web da Deputación provincial da Coruña.
- Certificación da titularidade de conta, expedida pola entidade bancaria

A concesión e pago do premio será publicado na Base de Datos Nacional de Subvencións (BDNS), no caso das autocandidaturas.

## 7. Entrega do premio

Realizarase no lugar e na data que determine a Presidencia da Deputación da Coruña, nun acto solemne e coa asistencia das persoas que compoñen a Corporación provincial e do xurado, así como de personalidades das artes, letras e ciencias da comunidade autónoma.

Xunto co premio, a persoa ou entidade galardoada recibirá unha copia da acta da reunión do xurado.

## 8. Normas supletorias

No que non estea previsto expresamente nestas bases, o xurado e a Deputación convocante terán en conta as normas contidas no regulamento do premio e nos xerais do funcionamento da Corporación provincial, así como na lexislación vixente.

## 9. Protección de datos

Os datos facilitados serán tratados pola Deputación da Coruña coa finalidade de tramitar esta convocatoria.

A participación nesta convocatoria implica aceptar a realización de fotografías e/ou vídeos pola Deputación da Coruña no certame de entrega dos premios ou no desenvolvemento das actividades complementarias.

As ditas imaxes poderán ser publicadas en:

- A páxina web e perfís en redes sociais da Deputación

- Filmacións destinadas á promoción da actividade
- Publicacións para dar a coñecer a actividade

A lexitimación para o tratamento dos datos persoais baséase no cumprimento dunha misión de interese público.

Os datos poderán ser comunicados ás Administracións públicas para o exercicio das súas competencias e serán conservados de acordo co establecido na normativa de arquivo.

As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Así mesmo se considera que o tratamento incumpre co establecido no RXPd pode reclamar perante a AEPD.

Poden consultar máis información relacionada coa protección de datos na nosa Política de Privacidade ou dirixindo un correo a [delegadodeprotecciondedatos@dacoruna.gal](mailto:delegadodeprotecciondedatos@dacoruna.gal).

A Coruña, 24 de marzo de 2026

O presidente,

Valentín González Formoso

O secretario,

Miguel Iglesias Martínez

2026/1819